


Il 9 da matg: Sogn Gregori Nazianzeno, uestg e confessur



Sogn Gregori ei naschius igl onn 300 a Nazianzo, in marcau dalla Cappadocia. El ha giu aunc in frar cul num Cesarius ed ina sora cul num Georgonia. Ils geniturs senumnavan Gregori e Nonna ed aschia dumbrava la famiglia tschun persunas. Tuttas tschun ein vivi ina veta sontga ed aschia daventai sogns. Il bab fuva all'entschatta in pagaun, mo vegnius convertius entras larmas, oraziuns, bien exempel e cussegls da sia sontga massera Nonna e da ses buns affons. El ha seschau battegiar e vivius schi exemplaricamein ch'el ei daventaus uestg da Nazianzo e morts leu sontgamein. Mo sur tut ei nies Gregori staus sogns e muort sia aulta sabientscha vegneva el numnaus il teolog e doctur dalla sontga Baselgia. Gia da pign mussava el claramain ch'el vegni ad esser in di ina sontgadad.

Siu pli grond plascher fuva d'urar, salidar Nossadunna, leger cudischs spirituals e far autras ovras da devoziun. El sez scriva d'ina notg en sien, cura ch'el fuva aunc pigns. Lura seigien duas dunschalas cumparidas ad el en alv. Ina da quellas senumnavi castiudad e l'autra tempronza. Quellas hagian detg ch'ellas seigien tarmessas da Diu per far cun el amicezia ed alianza. Suentar seigien ellas stadas stulidas. Gregori era lu sedestadaus e sentiun en sesez ina tala affecziun tier la castiudad che negina caussa dil mund fuss stada capavla d'engular ad el quei prezios scazi. Ses gronds duns e talents per studegiar ha el era ton bein applicau en Cesarea, en Palestina e sin sia universitad a Athenas ch'el ei daventaus professor e mussader pils auters sin quella famosa schola d'Athenas. Cheu ha il giuven fatg in'amicezia cul grond sogn Baseli e da leudenvi ein omisdus vivi en ina sontga, sincera e statteivla corrispondenza, amicezia e veneraziun.

Ventschiu ils studis e la professura ei Gregori ius a Ponta egl eremitadi tier siu car amitg Baseli. Cheu han quels dus giuvens survients da Diu cun gignar, urar, luvrar, studegiar e cun far da tuttats sorts mortificaziuns, smagrentau giu lur tgierp ch'els semegliavan pli la mort ch'in carstgaun viv. Il bab da Gregori fuva en ses vegls onns daventaus uestg da Nazianzo e lu vegnius cun malezia menaus en errur dils herets ch'el ha suttascret ils fauls mussaments dil concil da Riminese. Sinquei ei sogn Gregori vegnius a casa, ha currigiu il sbugl da siu bab e mess el puspei sin la dretga via dalla verdad. El ei buca mo vegnius battegius da siu agen bab, mobein era ordinaus sacerdot, sinaquei ch'el sappi segidar cun el en siu uestgiu, pertgei il bab fuva prest 90 onns vegls. En obediencia ha Gregori priu sin el quella dignitad sacerdotala e teniu siu emprem priedi igl onn 362 sin la fiasta da Pastgas. Silsuentar ha el cuntinuau da perdegar cun tal ardiment e fretg dallas olmas ch'el vegneva tenius da sia patria per in ver apiestel.

Essend sogn Baseli vegnius nominaus uestg da Cesarea, sche ei sogn Gregori encunter la voluntad da lez vegnius consecraus per uestg da Sasimo. Mo cuort sisu ha el stuii surpender igl uestgiu da Nazianzo, perquei che siu bab cun ses 100 onns pudeva buca pli far igl uffeci sufficientamein. Quella administraziun ha sogn Gregori fatg schi bein ch'el ha enteifer miez onn cun sia vegliontadad, stenta e prudientscha reformau igl entir marcau che la pietad e la tema da Diu flureva grondamein. Suentar la mort da siu bab havess el bugen

dau si igl uestgiu da Nazianzo per viver en ruaus zanza el solitari. Mo per cuntentar il pievel spiritual sco il secular ha el aunc per in temps guvernau quella baselgia, entochen ch'el ha pudiu urbir ora in auter per uestg en siu stagl e quel senunava Elalius. Sogn Gregori ha surdau ad Elalius igl uestgiu da Nazianzo e puspei turnaus anavos tier siu amitg sogn Baseli e la finala ius entraus en ina claustra, nua ch'el ei restaus sis onns zuppaus dil mund, mo bein renconuschiu da Diu, al qual el surveva di e notg cun urar e semortificar.

Enderschend che la cardientscha catolica seigi a Constantinopel messa bunamein diltut per tiara entras ils herets, sche ei Gregori vegnius da Diu clamaus dad ir a Constantinopel e cumbatter quels herets Arians. Quels ha el lu cumbattiu buca mo cun la bucca, mobein era cun la pleva aschi detschartamein ch'il marcu da Constantinopel fuvu zun bein semidau. Avon sia arrivada vevan ils catolics mo la baselgia da sogn Athanasi en quei grond marcu. Mo silsuenter han ei survegniu biaras autras, schizun la baselgia patriarchala han ils Arians stuiu ceder giu als catolics. Cheu ha sogn Gregori stuiu star ora grevas persecuziuns e suffierer biaras blasfemias, aviras, bastunadas e fridas dils herets per defensiun dalla sontga cardientscha. Mo Diu ha adina schurmegiau la veta da siu survient. Il patriarch d'Alexandria ed auters uestgs vulevan metter el patriarch da Constantinopel. Il sogn ha sedustau da sorprendere tala dignitad, mo ha lu per saver cun dapli autoritad sustener la cardientscha catolica acceptau la nominaziun e carschentau di per di il diember dils vers catolics.

Cun grond displascher e hass garegiavan ils herets da prender la veta al sogn patriarch. Els vevan dau l'incumbenza ad in lischau giuven da mazzar il sogn prelat che fuvu en letg malsaus. Quei giuven ei vegnius tiel malsau per exequir la schliata missiun. Mo el ha pigliau tala tema ch'el ei sefiers en schanuglias, confessau sia cuolpa, rugau per perdun e fatg penetienza sco il sogn veva cussegliu. Pertgei tutta vendetga ch'el fageva encunter ses inimitgs fuvu da rugar ch'els fetschien penetienza e vivien sco buns catolics.

El concil teniu a Constantinopel fuvu sogn Gregori vegnius confirmaus da 150 uestgs per patriarch da Constantinopel. Auncallura han zacons uestgs dall'Egipta per caschun dad ina preminenza leventau si ina gronda dispetta e scumbegl enten il cussegl. Per quietar ils uestgs scui e metter il cussegl puspei perina ei il sogn levasu si e detg: Percass che quella mal'aura ei rutta ora pervia da mei, sche vi jeu bugen sco in secund Jonas vegnir fiers en la mar per metter vus en ruaus. Sinquei renunziescha el al patriarchat e pren digl imperatur la lubientscha da metter giu il buordi episcopal. El va en baselgia sin scantschala, dad ina buna admoniziun al pievel present, dad il davos pietigot al marcu da Constantinopel, nua ch'el fuvu staus treis onns in grondius pastur e semetta bein prest sin viadi encunter Cappadocia.

In nundumbreivel pievel ha accumpignau il sogn pastur cun bargir e sospirar entochen vi tier la mar e buca schau giu egl aschi ditg che la nav ei stada veseivla. Lu eis el arrivaus a Nazianzo en sia patria e fatg leu siu testament cun schar sia rauba als paupers. El fuvu zun malsanetschs, mo luvrava auncallura cun gronda premura per scatschar lunsch naven las heresias dils Apollinarists. Sia malsogna carscheva pli e pli ed el ei ius ora sil hof da siu bab che senunava Alianzo. Cheu stueva el bunamein adina pertgitar il letg. Siu spert denton fuvu aunc frestgs per urar, meditar e scrire biaras nizeivlas caussas per la defensiun dalla cardientscha catolica.

El ha era sez descret sia veta ed en quella schau saver tut il mund ch'el hagi sin la fin da ses dis giu da pitir fermas tentaziuns dalla carn e siu magher murtirau tgierp hagi dau grond

contrast al spért. Quella descripziun finescha el cun quests plaidis plidai tier Diu: O Segner, danunder vegn ei che pli che la forza da miu tgierp tschessa e ton pli fetg crescha il fiug dalla concupiscenza passiun? Tut mia veta fuva spir malruasseivladad, battagliais e persecuziuns. Mo tia gronda misericordia ha adina gidau mei... Quei ei stau la veta da sogn Gregori. Jeu laschel denton il quitaun per igl avegnir a Jesus Cristus, sco el ha giu per il vargau.

In signur vischin cul num Valentinian ha era vuliu empruar quei ch'il demuni pudeva buca effectuar, cun numnadamein tarmetter tier sogn Gregori enzacontas malhonestas femnas. Quellas duevan tentar il sogn prelat tier il puccau cun lur turpegiusas tschontschas, macorts spass e maldischantas enzennas. Da quei ha sogn Gregori giu schi per mal ch'el ha bandunau siu hof ed ius en in auter liug, suenter ch'el ha giu fatg cun ina brev ina meriteivla correcziun a quei turpegius signur.

Perfin enzacons paders e religius pli da num che da veta, han persequitaun sogn Gregori cun aviras e cunzun vuliu encarpur el ed era tgisau el faulsamein avon igl uestg da Tianeia. Els vevan detg tontas manzegas ch'igl uestg Theodorus fuva seresolviun da strufegiar sogn Gregori solemnamein. Mo lez cun sia oraziun, pazienza, huimilitonza e penetienza ha surventschiu tuttas battagliais e menau tut las caussas per bien dallas olmas. Per ch'el falleschi buca cun plaidis e possi tener bein a mistregn la lieunga ha el mortificau quella cun star 40 dis senza plidar in plaid cun la glieud. En la vegliadetgna da 90 onns ha Gregori terminaun sia stentusa veta da lavur e travaglias ils 9 da matg digl onn 389. Sia sontga ossa ruaussa ussa a Ruma en la caplutta baghegiada da papa Gregori XIII en sia honur.

Reflexiun

Sco las personas da pigns merets e pauca entelgientscha han plascher da puder arrivar tier aults uffecis e da cumandar sils auters, aschia encuntercomi han ils principals sogns, pia personas da gronds merets e cun gronds talents, desiderau da saver viver el zuppau, senza uffecis e honurs mundanas. Pli studegiai e sogns ch'els fuvan, ton meins vengonz stimavan els sesez da retscheiver uffecis e dignitads per guvernar ils auters. In da quels umens ei segiramein sogn Gregori Nazianzeno staus. El ha pliras ga encuriu da survir sulettamein a Diu els eremitadis, claustras e loghens zuppai ed aunc lu ha el priu peda pils basegns dalla sontga Baselia e per menar las olmas tier il salvament. El ha lu era bandunau Diu muort Diu, quei vul dir: el ha snegau sesez, bandunau siu ruaus e semess el cumbat encunter ils inimitgs da Diu, per saver promover dapli la honur da Diu e carschentar la vera cardientscha. Havein nus duns e talents schi bials e buns sco quei che nus tertgein da haver, sche stuein nus perquei tuttina restar humiliteivels e secuntentar cun far endretg las obligaziuns da nies stan e mirar da suandar la voluntad da Diu e buca nossa ambiziun che vegn regida dallas schliatas pissiuns. Weisb. Ribad.